



KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE
Drejtoria e Ligjshmërisë

Data	
Nr. Prot	

RELACION
PËR
PROJEKTVENDIMIN
PËR
PËRCAKTIMIN E KUSHTEVE DHE KRITEREVE QË DUHET TË PLOTËSOJË PERSONELI I
KUALIFIKUAR PËR PËRDORIMIN E PAJISJES SË IDENTIFIKIMIT ELEKTRONIK TË VOTUESVE NË
QENDRËN E VOTIMIT, SI DHE TË PROCEDURAVE TË REKRUTIMIT

I. VLERËSIMI I LIGJSHMËRISË DHE HARMONIZIMI ME LEGJISLACIONIN NË FUQI

Referuar nenit 20, pikat 1, shkronja “ë” dhe 2, shkronja “c”, të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, Komisioni Rregullator shqyrton dhe miraton projektaktet me karakter normativ, të përgatitura nga administrata e KQZ-së ose nga anëtarët e tij, për rregullat për përdorimin e sistemeve apo pajisjeve të teknologjisë së informacionit, të domosdoshme për të siguruar përdorimin e ligjshëm, të rregullt, transparent, efikas dhe të qëndrueshëm të tyre, si dhe projektaktet e përgatitura nga administrata e KQZ-së, për përdorimin e sistemeve apo pajisjeve të teknologjisë së informacionit për të mbuluar aspekte apo procedura të veçanta të procesit zgjedhor, ose heqjen e tyre nga përdorimi.

Neni 23 i Kodit Zgjedhor përcakton se, sistemet apo pajisjet e teknologjisë së informacionit në zgjedhje vihen në përdorim nga personeli i kualifikuar i KQZ-së, i punësuar për këtë qëllim, përveçse kur Rregullatori vendos që përdorimi i tyre të bëhet nga operatorë privatë të kontraktuar sipas legjislacionit në fuqi për prokurimin e shërbimeve.

II. PËRMBLEDHJE SHPJEGUESE E PËRMBAJTJES SË PROJEKTVENDIMIT

Qëllimi i këtij projektvendimi është të përcaktojë rregullat e pranimit dhe trajnimit të personelit që do të caktohet nga Komisioni Qendror i Zgjedhjeve si operator teknik për përdorimin e pajisjeve të teknologjisë së informacionit për identifikimin elektronik të zgjedhësve në qendrat e votimit.

Ky projektvendim ka për objekt të përcaktojë:

- a) kushtet dhe kriteret që duhet të plotësojë shtetasi shqiptar që caktohet si operator teknik për përdorimin e pajisjes së identifikimit elektronik të zgjedhësve (PEI);

- b) procedurat e përzgjedhjes dhe të caktimit të operatorit teknik;
- c) përgjegjësitë e operatorit teknik gjatë ofrimit të shërbimit.

Pranimi i operatorëve teknikë bëhet në bazë të parimit të konkurrimit të hapur. Komisioneri Shtetëror i Zgjedhjeve shpall publikisht thirrjen për shprehje interesi nga shtetas të cilët janë të gatshëm të ofrojnë shërbimin si operator teknik, për përdorimin e pajisjes së identifikimit elektronik të zgjedhësve në qendrën e votimit. Kandidati për operator teknik duhet të plotësojë kushtet dhe kriteret e përcaktuara në këtë projektvendim.

Thirrja publike përmban kushtet dhe kriteret për përzgjedhjen e kandidatëve për operatorë teknikë, si dhe mënyrën dhe afatin e aplikimit. Aplikimi nga të interesuarit kryhet në faqen elektronike zyrtare të KQZ-së, në një rubrikë të veçantë të krijuar për këtë qëllim. Shtetasit e interesuar vetëdeklarojnë lidhur me të dhënat e kërkuara për përmbushje të kërkesave, duke plotësuar fushat përkatëse dhe dërgojnë në rrugë elektronike në KQZ formatin e plotësuar. Mosdeklarimi i saktë i të dhënave ose deklarimi i rremë i tyre passjell sipas rastit përgjegjësi penale ose administrative për aplikuesin.

Krijon papajtueshmëri me detyrën dhe nuk mund të caktohet si operator teknik, shtetasi i cili:

- a) ka marrëdhënie krushqie të afërt ose gjinie deri në shkallë të katërt, ose marrëdhënie pune me ndonjërin nga kandidatët që konkurrojnë në zonën zgjedhore ku ndodhet qendra e votimit në të cilën operatori teknik është caktuar;
- b) është ushtarak, punonjës i strukturave të Policisë së Shtetit, Gardës së Republikës, Ministrisë së Brendshme, i Shërbimit Informativ Shtetëror, Agjencisë së Inteligjencës dhe Sigurisë së Mbrotjtjes, Agjencisë së Mbikëqyrjes Policore dhe shërbimeve të tjera me objekt veprimtarie të ngjashme me sa më sipër.

Struktura përgjegjëse e administratës së KQZ-së, përgatit listën e shtetasve të cilët përmbushin kërkesat dhe kushtet për të qenë operator teknik, jo më vonë se 15 (pesëmbëdhjetë) ditë para datës së zgjedhjeve. Shtetasit e përzgjedhur i nënshtrohen trajnimit dhe testimit të njohurive, për shërbimin si operator teknik. Shtetasit e përzgjedhur të cilët nuk do të marrin pjesë në trajnim, apo nuk do të kalojnë testimin, nuk mundet të caktohen si operatorë teknikë. Procesi do të drejtohet, mbikëqyret dhe monitorohet nga Nënkomisioneri Shtetëror i Zgjedhjeve.

Komisioneri Shtetëror i Zgjedhjeve dhe Nënkomisioneri Shtetëror i Zgjedhjeve caktojnë operatorë teknikë shtetasit e përzgjedhur, jo më vonë se 7 (shtatë) ditë përpara ditës së zgjedhjeve. Nëse për shkaqe të ndryshme, operatori teknik i caktuar nuk paraqitet për ofrimin e shërbimit, në vend të tij caktohet një person tjetër, i cili është në listën e personave të përzgjedhur.

Ky projektvendim përcakton përgjegjësitë e operatorëve teknikë. Detyrat operacionale të operatorit teknik do të përcaktohen me vendim të përbashkët të Komisionerit Shtetëror të Zgjedhjeve dhe Nënkomisionerit Shtetëror të Zgjedhjeve.

Ofrimi i shërbimit bëhet në përputhje me kontratën e nënshkruar ndërmjet Komisionit Qendror të Zgjedhjeve dhe operatorit. Operatorët teknikë, për shërbimin e ofruar, përfitojnë shpërblim në masën e përcaktuar me vendim të përbashkët të Komisionerit Shtetëror të Zgjedhjeve dhe Nënkomisionerit Shtetëror të Zgjedhjeve. KQZ-ja mbulon shpenzimet e transportit për rastet kur operatori teknik ofron shërbimin jo pranë vendbanimit të tij dhe përllogaritja bëhet në përputhje me aktet normative përkatëse.

Operatorët teknikë votojnë pranë qendrës së votimit ku janë caktuar për të ofruar shërbimin. Për zgjedhjet e pjesshme, operatorët teknikë votojnë pranë qendrës së votimit ku janë caktuar nëse janë pjesë e listës së zgjedhësve të zonës zgjedhore përkatëse.

Ky projektvendim nuk paraqet kosto shtesë për Buxhetin e Shtetit.

Për sa më sipër në këtë relacion, Komisioneri Shtetëror i Zgjedhjeve dhe Nënkomisioneri Shtetëror i Zgjedhjeve, brenda kompetencave dhe në respektim të detyrimeve e afateve ligjore të përcaktuara në ligjin nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, i propozojnë Komisionit Rregullator për shqyrtim dhe miratim, projektvendimin “Për përcaktimin e kushteve dhe kriterëve që duhet të plotësojë personeli i kualifikuar për përdorimin e pajisjes së identifikimit elektronik të votuesve në qendrën e votimit, si dhe të procedurave të rekrutimit”.

Nënkomisioneri Shtetëror i Zgjedhjeve

Lealba PELINKU

Komisioneri Shtetëror i Zgjedhjeve

Ilirjan CELIBASHI



REPUBLIKA E SHQIPËRISË
KOMISIONI QENDROR I ZGJEDHJEVE

Komisioni Rregullator

Data:

Nr:

Ora:

PROJEKTVENDIM

PËR

**PËRCAKTIMIN E KUSHTEVE DHE KRITEREVE QË DUHET TË PLOTËSOJË PERSONELI I KUALIFIKUAR
PËR PËRDORIMIN E PAJISJES SË IDENTIFIKIMIT ELEKTRONIK TË VOTUESVE NË QENDRËN E
VOTIMIT, SI DHE TË PROCEDURAVE TË REKRUTIMIT**

Në mbështetje të nenit 20, pikat 1, shkronja “ë”, dhe 2, shkronja “c”, nenit 23, të ligjit nr.10019 datë 29.12.2008 “Kodi Zgjedhor i Republikës së Shqipërisë”, të ndryshuar, me propozimin Komisionerit Shtetëror të Zgjedhjeve dhe Nënkomisionerit Shtetëror të Zgjedhjeve

V E N D O S I:

Neni 1

Qëllimi dhe objekti

1. Qëllimi i këtij vendimi është përcaktimi i rregullave të pranimit dhe të trajnimit të personelit që do të caktohet nga Komisioni Qendror i Zgjedhjeve (KQZ) si operator teknik për përdorimin e pajisjeve të teknologjisë së informacionit për identifikimin elektronik të zgjedhësve në qendrat e votimit (QV).
2. Objekti i këtij vendimi është të përcaktojë:
 - a) kushtet dhe kriteret që duhet të plotësojë shtetasi shqiptar që caktohet si operator teknik për përdorimin e pajisjes së identifikimit elektronik të zgjedhësve (PEI);
 - b) procedurat e përzgjedhjes dhe të caktimit të operatorit teknik;
 - c) përgjegjësitë e operatorit teknik gjatë ofrimit të shërbimit.

Neni 2

Papajtueshmëritë me detyrën e operatorit teknik

1. Nuk mund të caktohet si operator teknik, shtetasi i cili:
 - a) ka marrëdhënie krushqie të afërt ose gjinie deri në shkallë të katërt, ose marrëdhënie pune me ndonjërin nga kandidatët që konkurrojnë në zonën zgjedhore ku ndodhet qendra e votimit në të cilën operatori teknik është caktuar;
 - b) është ushtarak, punonjës i strukturave të Policisë së Shtetit, Gardës së Republikës, Ministrisë së Brendshme, i Shërbimit Informativ Shtetëror, Agjencisë së Inteligjencës dhe Sigurisë së Mbrojtjes, Agjencisë së Mbikëqyrjes Policore dhe shërbimeve të tjera me objekt veprimtarie të ngjashme me sa më sipër.

Neni 3

Kushtet për t'u caktuar operator teknik

1. Pranimi i operatorëve teknikë bëhet në bazë të parimit të konkurrimit të hapur.
2. Kandidati duhet të ketë të paktën arsim të mesëm të lartë. Në përzgjedhje, përparësi ka kandidati me arsim të lartë.
3. Kandidati për operator teknik duhet të plotësoj kushtet si më poshtë:
 - a) gëzon të drejtën për të qenë zgjedhës;
 - b) nuk është dënuar me vendim gjyqësor të formës së prerë për kryerjen me dashje të një vepre penale;
 - c) nuk ka qenë anëtar i komisioneve zgjedhore dhe grupeve të numërimit në dy zgjedhjet e fundit;
 - ç) nuk është anëtar i strukturave drejtuese të ndonjë partie politike, të paktën tre vitet e fundit;
 - d) nuk ka qenë i përfshirë publikisht në veprimtari dhe aktivitete politike dhe elektorale për llogari të një subjekti zgjedhor në 5 vitet e fundit;
 - dh) të mos ndodhet në kushtet e konfliktit të interesave;
 - e) të ketë njohuri dhe aftësi minimale të përdorimit të pajisjeve të teknologjisë së informacionit si kompjuter, smartphone, etj.;
 - ë) të jetë i gatshëm për të ofruar shërbimin edhe larg vendbanimit.
3. Operatori teknik duhet të jetë me vendbanim në territorin e zonës zgjedhore ku ndodhet qendra e votimit ku ai do të caktohet nga KQZ. Përgjatimisht për rastet e qendrave të votimit, për të cilat nuk ka pasur aplikime, apo refuzohen nga aplikuesit, Komisioneri dhe Nënkomisioneri caktojnë edhe një operator që nuk është me banim në atë zonë zgjedhore.

Neni 4

Paraqitja e kërkesës

1. Komisioneri Shtetëror i Zgjedhjeve, shpall publikisht, thirrjen për shprehje interesi nga shtetas të cilët janë të gatshëm të ofrojnë shërbimin si operator teknik për përdorimin e pajisjes së identifikimit elektronik të zgjedhësve në qendrën e votimit.
2. Thirrja publike sipas pikës 1, të këtij neni, përmban kushtet dhe kriteret e përcaktuara në këtë vendim për kandidatët për operatorë teknikë, si dhe mënyrën dhe afatin e aplikimit.
3. Aplikimi nga të interesuarit kryhet elektronikisht duke plotësuar fushat përkatëse në portalin për aplikime në faqen zyrtare të KQZ-së.
4. Mosdeklarimi i saktë i të dhënave ose deklarimi i rremë i tyre passjell sipas rastit përgjegjësi penale ose administrative për aplikuesin.

Neni 5

Procedurat e shqyrtimit të kërkesave

1. Jo më vonë se 15 (pesëmbëdhjetë) ditë para datës së zgjedhjeve, struktura përgjegjëse e administratës së KQZ-së, përgatit listën e shtetasve të cilët përmbushin kërkesat dhe kushtet për të qenë operator teknik, sipas përcaktimeve të neneve 2 dhe 3, të këtij vendimi.
2. Shtetasit e përzgjedhur sipas parashikimeve të pikës 1 të këtij neni, i nënshtrohen trajnimit dhe testimit të njohurive, për shërbimin si operator teknik.
3. Shtetasit e përzgjedhur sipas parashikimeve të pikës 1, të këtij neni, të cilët nuk marrin pjesë në trajnim, apo nuk kalojnë testimin sipas parashikimeve të pikës 2, të këtij neni, nuk mundet të caktohen si operatorë teknikë.
4. Procesi i parashikuar në pikat 1, 2 dhe 3 të këtij neni drejtohet, mbikëqyret dhe monitorohet nga Nënkomisioneri Shtetëror i Zgjedhjeve.

Neni 6

Caktimi i operatorëve teknikë

1. Jo më vonë se 7 (shtatë) ditë përpara datës së zgjedhjeve Komisioneri Shtetëror i Zgjedhjeve dhe Nënkomisioneri Shtetëror i Zgjedhjeve caktojnë operatorë teknikë shtetasit e përzgjedhur sipas nenit 5, të këtij vendimi.
2. Nëse për shkaqe të ndryshme operatori teknik i caktuar nuk paraqitet për ofrimin e shërbimit, në vend të tij caktohet një person tjetër, i cili është në listën e personave të përzgjedhur, sipas nenit 5 të këtij vendimi.

Neni 7

Përgjegjësitë e operatorëve teknikë

1. Operatori teknik ushtron përgjegjësitë dhe përmbush detyrat e tij në mënyrë të paanshme dhe në përputhje të plotë me aktet e KQZ-së.
2. Operatori teknik nuk ka rol vendimmarrës në lidhje me të drejtën e zgjedhësit për të votuar ose jo.
3. Operatori teknik është përgjegjës për vënien në punë dhe përdorimin e pajisjes së identifikimit elektronik të zgjedhësve vetëm në qendrën e votimit ku është caktuar, sipas manualit të përdorimit të saj dhe procedurave të përcaktuara në aktet e KQZ-së
4. Operatori teknik nuk ka të drejtë të përgatisë dhe/ose të administrojë dokumentacion apo material zgjedhor.
5. Gjatë ushtrimit të detyrës, apo pas përfundimit të saj, nuk duhet të sigurojë, japë informacion apo bëjë publike për partitë politike, mediat, organizata të shoqërisë civile, të dhëna lidhur me ecurinë e procesit të identifikimit elektronik të zgjedhësve apo pjesëmarrjen e zgjedhësve në votime.
6. Operatorët teknikë mbajnë përgjegjësi civile dhe/ose penale për veprimet/mosveprimet e tyre në kundërshtim me kontratën dhe/ose legjislacionin penal në fuqi.
7. Detyrat operacionale të operatorit teknik përcaktohen me vendim të përbashkët të Komisionerit Shtetëror të Zgjedhjeve dhe Nënkomisionerit Shtetëror të Zgjedhjeve.

Neni 8

Ofrimi i shërbimit

1. Ofrimi i shërbimit bëhet në përputhje me kontratën e nënshkruar ndërmjet KQZ-së dhe operatorit.
2. Operatorët teknikë për shërbimin e ofruar, përfitojnë shpërblim në masën e përcaktuar me vendim të përbashkët të Komisionerit Shtetëror të Zgjedhjeve dhe Nënkomisionerit Shtetëror të Zgjedhjeve. KQZ-ja mbulon shpenzimet e transportit për rastet kur operatori teknik ofron shërbimin jo pranë vendbanimit të tij. Përlllogaritja bëhet në përputhje me aktet normative përkatëse.

Neni 9

Votimi i operatorëve teknikë

Operatorët teknikë votojnë pranë qendrës së votimit ku janë caktuar për të ofruar shërbimin sipas përcaktimeve të Kodit Zgjedhor.

Neni 10

Shfuqizimi dhe hyrja në fuqi

Data: .2023 Nr:
Ora: 11:00



“Për përcaktimin e kushteve dhe kritereve që duhet të plotësojë personeli i kualifikuar për përdorimin e pajisjes së identifikimit elektronik të votuesve në qendrën e votimit, si dhe të procedurave të rekrutimit”

1. Vendimi nr.7, datë 2.3.2021, i Komisionit Rregullator, “Për caktimin e personelit të kualifikuar për përdorimin e pajisjeve të teknologjisë së informacionit në qendrën e votimit” dhe vendimi nr. 11, datë 31.1.2022, i Komisionit Rregullator, “Për përcaktimin e kushteve dhe kritereve që duhet të plotësojë personeli i kualifikuar për përdorimin e pajisjes së identifikimit elektronik të votuesve në qendrën e votimit, si dhe të procedurave të rekrutimit”, shfuqizohen.
2. Ky vendim hyn në fuqi menjëherë dhe publikohet në faqen elektronike zyrtare të Komisionit Qendror të Zgjedhjeve.
3. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit Tiranë, brenda 5 (pesë) ditëve nga shpallja e tij.

Ilirjana NANO

Kryetar

Arens ÇELA

Anëtar

Dritan ÇAKA

Anëtar

Helga VUKAJ

Anëtar

Muharrem ÇAKAJ

Anëtar

Data: .2023 Nr:
Ora: 11:00



“Për përcaktimin e kushteve dhe kritereve që duhet të plotësojë personeli i kualifikuar për përdorimin e pajisjes së identifikimit elektronik të votuesve në qendrën e votimit, si dhe të procedurave të rekrutimit”